

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9



大方廣佛華嚴經疏鈔卷一之三

于闐國三藏沙門實又難陀

譯

清涼山大華嚴寺沙門澄觀撰述

世王妙嚴品第一之一

○疏第六有十佛世界下明眾海雲集眾雖深廣難測畧啓十門一集意二集因三辯類四定數五權實六地位七前後八有無九聞不聞十釋文

今初來至佛所何所為耶有十義故一為影響為主伴故二為作輔翼得圓滿故如普賢等常隨之眾三為守護如來如執金剛等諸佛任處常勤護

C40
4514
240

D 64853

撰述
故四爲莊嚴如道場神等常爲嚴淨佛宮殿故五
爲供養如偈讚卽正行供養華幢等卽財供養故
六爲發起此經諸請難者卽其事故七爲聞法獲
益當機領悟卽其類故八爲表法諸首諸林表信
行等皆同名故及座出菩薩等顯奇特故亦通表
萬行俱成佛故九爲順證佛菩薩等證說不虛故
十爲翻顯卽聲聞不聞顯法不共故爲斯多意所
以衆海雲集非爲證信而已也 鈔一爲影響者
此集意中十意皆闡取下經此初義引卽諸大菩
薩及下證法如來皆互爲主伴若影之隨形響之

應聲三爲守護者經云皆於往昔無量劫中恒發
大願願常親近供養諸佛又下經云一切諸佛化
形所在皆隨化往一切如來所任之處常勤守護
四常爲嚴淨者此卽主城神德下經云皆於無量
不思議劫嚴淨如來所居宮殿所以標道場神此
中等字等城神故然道場神合嚴道場以道場神
所歎德中但云皆於過去值無量佛成就願力廣
興供養釋曰由無嚴飾之文故等取城神之文耳
五爲下以義繁重故總相引偈讚下妙嚴品其華
幢等卽二十二經昇兜率天宮品六爲發起者卽

解脫月

疏第二集因亦有十因。一。曾與毘盧遮那如來同集善根故。二。蒙佛四攝。曾攝受故。三。住在生死聞圓法故。四。曾發大心護一切故。五。在發大願願事佛故。六。隨逐如來無厭足故。七。樂聞正法。心無倦故。八。善能散滅我慢心故。九。福智已淨。身周徧故。十。同一法性善根大海之所生故。爲此多義。得與斯會。中有集因。亦通集意。及隨諸衆各有別因。可以思準。鈔一曾與者。卽菩薩德中云。此諸菩薩。往昔皆與毘盧遮那如來共集善根。修菩薩行。二

蒙佛者。卽第二經初總歎衆云。如是皆以毘盧遮那如來往昔之時。於劫海中修菩薩行。以四攝事而曾攝受。三。卽義引入法界品。諸聲聞等。住在生死。不曾聞此。故不見聞。反顯菩薩昔曾聞故。四。卽夜叉王德。云皆勤守護一切衆生。此亦義引。如海雲言。發哀愍心。有怖畏者。咸守護故。五。卽身衆神德。文云。皆於往昔成就大願。供養承事一切諸佛。六。卽足行神德。文云。皆於過去無量劫中親近如來。隨逐不捨。卽無厭足。七。卽乾闥婆王德。文云。皆於大法深生信解。歡喜慶重。勤修不倦。八。卽王風

神德。文云。皆勤散滅我慢之心。亦阿修羅德。文云。悉已精勤摧伏我慢。及諸煩惱。九卽菩薩德。文云。一切如來功德大海。咸入其身。一切諸佛所在國土。皆隨願往。亦通就義說。其二嚴者。方能周徧。至諸佛所。十亦菩薩德。文云。皆從如來善根海生。中有集因。亦通集意者。謂卽五六七八五約往願承願而來。卽是集意。由願得來。卽是集因。六約隨逐心樂隨逐。卽是集意。由樂隨逐。故得來集。卽是集因。七約樂聞大法而來。卽是集意。由樂得來。卽是集因。八約散我爲歎。散我卽是集意。由散我故。方

得在會。卽是集因。初四後二。但是其因。同集善等。得在道場。但爲集因。非爲別來。爲同集善等。故非集意。及隨諸衆。各有別因者。卽下經文。隨名歎德。然上所引。卽是其文。然經隨便。宜歎德不同。如風神云。散滅我慢之心。語其大意。總此十因。徧通多衆。故此別說隨衆別因。

疏第三辯類。卽上集意。便成十類。一影響衆。二常隨衆。三守護衆。四嚴會衆。五供養衆。六發起衆。七當機衆。八表法衆。九證法衆。十顯法衆。準前可知。疏第四定數者。稱法界衆。焉能數知。卽文而言。九

會都數。總有一百七十五衆。都序之中。有四十一衆。謂同生有一。異生三十九。師子座中一。若兼取前菩提樹中所流。及宮殿中無邊菩薩。總四十三衆。此四十三。徧於九會。第一會中有二衆。謂新集十方衆。佛眉間衆。添成四十五。第二會有新舊二衆。第三四會各有四衆。謂新舊及證法衆。天衆。第五會一百一十一衆。謂新舊衆。昇天品內供養衆。有一百七。并天衆。證法衆。第六會四衆。謂天衆。同生。異生。證法衆。七八兩會。各唯一衆。謂普賢等舊衆。第九會三衆。謂菩薩。聲聞。及天王等舊衆。舊衆

雖重。隨會別故。並皆取之。然此諸衆。或總爲一。一乘衆故。或分爲二。以有實衆。及化衆故。或可爲三人。天神故。或爲四。佛菩薩。人。非人。故。或五。非人。開天神故。或六。加畜生故。或七。天。欲色故。或八。菩薩。有此界他界故。或九。他方有主伴故。或十。加聲聞故。或一百七十五。如前說故。或無量無邊。義類多方故。一一。或以剎塵數等爲量故。又如新集菩薩。毛光出衆。例上皆爾。故一一衆。皆無分齊。此猶約相別。若融攝。一一會中。皆具一百七十五衆。以稱法界緣起之會。互相在故。上且約一界。若通十

方及異類刹帝網無盡無盡是爲華嚴海會衆
數。

疏第五權實者。夫能對揚聖教。影響其迹。靡不是
權。當機之流。多皆是實。諸教所明。穢土之中。雜類
菩薩聲聞。皆通權實。地前是實。地上是權。法身無
生。生五道故。淨土菩薩。唯實實報。生故。雜類聲聞
是權。攝論云。欲令淨土不空。化作雜類衆。故。若依
此經。同生異生。皆通權實。海印定現。實德攝故。隨
緣隨位。而示現故。第二會初云。莫不皆是一生。補
處故。對前十類。辯權實者。影響一衆。自有二類。一

果德衆。謂能加證法諸佛。互爲主伴。非權非實。若
位極菩薩。影響一向是權。故有經云。昔爲釋迦師。
今爲佛弟子。二尊不並化。故我爲菩薩等。當機唯
實。餘八通權實。鈔對前十類下。對前別辯云。互
爲主伴。非權非實者。然權實有其二類。一本高迹
下。如佛爲菩薩。二本下迹高。如菩薩爲佛。今既是
佛。則非迹下。實是如來。又非本下。則是實非權。無
權可對。故亦非實。同果海故。昔爲釋迦者。畧有二
經。一。卽放鉢經。但云。昔爲釋迦師。今爲佛弟子。二
尊不並化。故我爲菩薩。二。菩薩處胎經第四。亦同

撰述
華嚴經疏
卷之三
九
此說文云計我成佛身此刹爲最小座中有疑故於胎現變化我身如微塵今在他國土三十二相明在在無不現昔爲能仁師今乃爲弟子佛道極廣大清淨無增減我欲現佛身二尊不並立此界現受教我刹見佛身下取意引佛刹名無碍佛名昇仙尊經云我身儒首是又云刹土名究竟佛名大智慧亦結屬已云我身儒首是當機唯實者上至等覺下至地前皆有當機並皆稱實餘八通權實可以意得

疏第六地位者有說一切皆是果位以是舍那海

印現故或說一切皆因果海非可見聞世尊亦是因者識所現故或皆通因果果不捨因隨類現故因位願力助佛化故當機之流正修趣故或俱非因果緣起大眾同真性故將此對前權實則果位一向權因位通權實若對前十類影響證法通因果餘八唯因因位高下難以準定鈔將此料揀者初對第五門料揀若對前十類卽對第三門料揀

疏第七前後者初列菩薩後列餘衆者表從本以起末下讚卽後明菩薩者表尋末歸本良以本末

無二。故二文互舉。又從本流末。必先小後大。故自在天爲末。攝末歸本。必從淺至深。故先明自在。然皆顯法界緣起。逆順自在故也。又表四十二位。一皆徹因門。並該果海。故互舉前後。令物不作優劣之解故。鈔第七前後等者。謂約列衆。餘經或從勝先列。或從微至著。或先列聲聞。後列菩薩。今此衆海。何者爲先。今明列與讚德。前後不同。然以菩薩爲本。雜類爲末。讚中先三卷明雜類讚。後第五卷方明菩薩讚。故云尋末歸本。又從本下。通妨謂有難言。就前列中。旣菩薩爲本。雜類爲末。先本

後末。卽合諸天之內。從自在天。次明廣果。次列三禪等。何以先明欲界。後列初禪二禪等耶。是則先小後大矣。故今答云。菩薩爲本。猶如一乘雜類爲末。如流三乘。三乘之中。初於鹿苑轉於四諦。漸次歸大。故先列欲界。後列色界。如次而上。故云先小後大。故自在爲末。末卽末後耳。攝末歸本者。又有難言。讚德之中。表尋末歸本。後明菩薩者。則合先明日月天讚。末後方明自在天讚。何以雜類之中。先明自在讚耶。故今答云。攝末歸本。必從深至淺。謂菩薩是所歸之本。雜類是所攝之末。攝末必從

勝先攝。如海攝百川。必先攝江。次攝大河。次攝小河。次攝溝洫。故攝歸一乘。先攝權。次攝緣。覺。次攝聲聞。次攝天人。一毫之善。無不皆攝。故先明自在。天讚。表是所攝之中。先攝勝也。末明月天等。表所攝之中。後收劣也。

疏第八有無者。亦有十類。一約界。無無色。二約趣。無地獄。此二非器故。若約轉生。有地獄天子。若約所益。亦通無色。三界皆益故。三約洲。但列閻浮。餘三畧無故。或成難故。四約乘。無二乘不共教。故下爲顯法。亦不見聞故。智度論云。若小乘經初。唯列

聲聞。若大乘經初。具列菩薩聲聞。若一乘經初。唯列菩薩。故指此經爲不共教。或大乘經唯列小者。爲引攝故。如金剛經。或唯列大。亦屬大乘。王伴具者。必是一乘。五約部。無四衆。未說小教故。六約王。無人王。王未知故。七約三聚。無邪定。彼障隔故。生盲之流。但冥益故。八約內外。無外道。非彼測故。九約諸天。無無想。入邪定故。十約善惡。無惡魔。不爲違害。天中攝故。上十且隨相說。圓融應有。卽無所不具。鈔四約乘。無二乘者。此段有四。一正明。二爲顯法下。通妨。謂有難言。若無二乘。第九會中。何

得有耶。答云爲顯法耳。次又難云若爲顯法則有二乘。答云亦不見聞與無同故。三智論云下引證云明無小乘。是不共義。四或大乘經下重通妨難。正通智論兼通正義。謂有問言現有唯小。而是大乘。如金剛經。那言列小。是小乘經耶。答云爲引攝故。智論就其大畧。故唯列小乘。是小乘經。如金剛經等。別是一理耳。或唯列大一乘等。謂王伴不具者。卽如楞伽等是也。

疏第九聞不聞者。約權前後皆互得聞。約實當會自聞。縱不起前而起於後。亦各不相知。若約頓機。許一時頓領。鈔縱不起前下通妨。謂有問言。若約實。衆不互聞者。如來說法。旣不起前而起於後。如何聽衆不得互聞。故今答云。約佛前後圓融。約根互不知覺。故法慧云。一切闍浮提。皆言佛在中。我等今見佛。任於須彌頂。則知各不相知也。疏上之九門。且從顯著。畧爲此釋。中本廣本。或隱或顯。不可執文。

疏第十釋文。第一會中。前總四十衆。大分爲二。初二同生。餘是異生。地論論云。解脫月是。同生衆。故又云。同生衆。請則知兼有地前。明知不約地位。餘

釋云云不符論意云何名爲同異生耶然有二義
一謂雜類作諸異生種種形故菩薩得法性身同
人作一類菩薩形故二菩薩爲同者通諸位故神
等爲異法界差別德故鈔餘釋云云者有釋云
聲聞爲同菩薩爲異謂小乘斷惑同故有云出家
菩薩聲聞爲同餘並爲異此約形相同故上二解
俱非論意以經八會無聲聞故論釋地經經亦無
故初成正覺無出家故或云登地爲同同證真故
餘皆是異是以地前名異生性故有云八地以上
爲同同無漏故上之二解亦違論文論王但云解

脫月是同生衆本不曾言約地位故又論明大衆
請云有同生衆請有地前故所以知有者由金剛
藏云有行未久解未得隨識而行不隨智聞此生
疑墮惡道我愍是等故不說大衆承此便請明大
衆之中有行未久卽地前故復有釋云雜類爲同
以受彼彼同類身故菩薩爲異不約同彼衆生類
故此亦違論解脫月爲同故又有釋云菩薩雜類
俱爲同法界無二故俱爲異法界差別故此約實
義豈得爲釋同異之殊明知上來並非正解故云
餘釋云云不符論意云何名爲下上出同異生體

今釋同異生義。然其二釋前約事相。後約表法。又有將此四十衆以配地位。同生衆中。開之爲二。謂十普菩薩。卽是圓因。對前菩薩以爲所信。從海月光下。及執金剛爲十住。復將一一位中十名。如次配於十度。海月光等十菩薩。配初發心住。此住本卽是檀。其十菩薩。復配檀中具十。則令十住自有百度。歷於五位。有五百波羅密。以等覺位。亦有十故。王稼神下十衆配十行。修羅下配十向。三十三天下配十地。前十普菩薩是等覺地。此配則似生情。然經勢多端。配亦無失。但不俟如此不次。謂四

十衆以配三賢十聖。下師子座衆以配等覺。肩間出衆以配妙覺。則四十二衆配四十二位。於理甚直。

有十佛世界微塵數菩薩摩訶薩所共圍繞。

疏其四十衆。文皆有三。一。標數辯類。二。列名結數。三。攝德周圓。今初同生衆中。第一標數辯類中。初標辯佛世界者。下。辯世界畧有三類。一。世界。二。種。三。海。今云世界。則非種非海。權實共許。一三千界。一佛化境故。或名佛刹佛土。皆準此也。微塵者。七極微量也。謂抹三千界並爲微塵。一塵爲一菩薩。

撰述
華嚴疏鈔卷一之三
十一
則數已難量矣。况舉十數。表無盡耶。菩薩摩訶薩者。辯類也。卽揀非餘衆。具云菩提薩埵。摩訶薩埵。今從畧耳。然有三釋。一。菩提是所求佛果。薩埵是所化衆生。卽悲智所緣之境。從境立名。故名菩薩。二。菩提是所求之果。薩埵是能求之人。能所合目。故名菩薩。三。薩埵此云勇猛。謂於大菩提。勇猛求故。摩訶云大。大有四義。一者願大。求大菩提故。二行大。二利成就故。三時大。經三無數劫故。四德大。具足一乘諸功德故。前二通地前。後二或唯地上。更有諸大。亦不出此。此等並是舍那佛自眷屬。動

止常隨。故云所共圍繞。

其名曰普賢菩薩摩訶薩

疏二。其名下。列名結數。先列其名。後結畧顯廣。今初。夫聖人無名。爲物立稱。雖得名千差。而多依行德。行德皆具。而隨宜別標。鈔直彰大意中。初總標無名。故莊子云。至人無己。神人無功。聖人無名。今約利生。無而強立耳。雖得名下。總辯立名。此辯立名。別因言多依行德者。亦有因姓。因父母等。故行德皆具下。通妨。謂有難云。旣依行德。而諸菩薩德行皆具。何以成別。故云隨宜別標。隨便宜故。謂

有偈云。弟子堅固菩提心。從師以受灌頂位。妙修定慧。恒觀察。深入業用善巧門。卽普賢菩薩。又云。導諸有情勝菩提。以四攝法而攝取。卽金剛王菩薩。無厭大悲未曾捨。卽金剛愛菩薩。見行小善便稱美。卽金剛善哉菩薩。無閔檀施等虛空。卽金剛寶菩薩。亦虛空藏菩薩。別名能以慧光破愚冥。卽金剛日菩薩。亦云金剛光。有所樂求恒不逆。卽金剛幢菩薩。發言先笑令心喜。卽金剛笑菩薩。能於妙法無染中。卽金剛法菩薩。善用般若斷諸使。卽金剛利菩薩。亦卽文殊師利是。無上法輪恒不退。

卽金剛因菩薩。亦云金剛轉法輪菩薩。四辯演說無所畏。卽金剛語言菩薩。諸佛衆生事業中。卽金剛業菩薩。恒被堅誓慈悲甲。卽金剛護菩薩。亦云金剛甲冑菩薩。摧破魔羅勝軍衆。卽金剛藥叉菩薩。亦云金剛牙菩薩。堅持諸佛所秘門。卽金剛拳菩薩。又如乘聲濟物。卽曰觀音手中雨華。便名華手等。皆隨德隨宜。

疏先十同名普者。顯具法界總相德故。後十異名者。顯具法界別相德故。總別相融。同一法界。今初十名之普。是別之總。普下十異。顯卽普能別。普義

方成。鈔今初十名下。應有難云。前云十普。既顯法界總相之德。何得更有普德普光等殊。故爲此通。

疏此是古今諸佛同行普賢之行。隨於諸位差別不同。縱成正覺。亦普行攝。故先明之。鈔此是古今下。明先列所以可知。然其釋名。皆取下文所得法門。以成會釋。由得解脫。各隨所得。以立其名。所以前云。依德行立。此若不了。但尋下經。自當分明。疏言普賢者。體性周徧。曰普。隨緣成德。曰賢。此約自體。又曲濟無遺。曰普。隣極亞聖。曰賢。此約諸位。

普賢。又德周法界。曰普。至順調善。曰賢。此約當位。普賢。又果無不窮。曰普。不捨因門。曰賢。此約佛後。普賢。位中。普賢悲智雙運。佛後普賢智海已滿。而運卽智之悲寂。而常用窮未來際。又一卽一切曰普。一切卽一。曰賢。此約融攝。所以先列者。爲上首故。法門王故。法界體故。一切菩薩無不乘故。無一如來非此成故。今諸聞者。見自身中。如來藏性。行普行故。上雖多義。離釋。今從別稱。合釋無處不賢。名曰普賢。卽體普也。此一爲總。餘九爲別。

普德最勝燈光照菩薩摩訶薩。

疏二德普謂稱性之德充於法界以爲最勝委照無遺如燈之光。

普光師子幢菩薩摩訶薩。

疏三慧普徧照嚴刹決定高出故。

普寶燄妙光菩薩摩訶薩。

疏四行普內行圓淨智燄外燭故稱爲妙。

普音功德海幢菩薩摩訶薩。

疏五音普具一切音演佛淨土深廣高出之行故。

普智光照如來境菩薩摩訶薩。

疏六智普照佛法界無盡境故。

普寶髻華幢菩薩摩訶薩。

疏七心普智寶嚴於心頂通行等華高出物表故。

普覺悅意聲菩薩摩訶薩。

疏八覺普徧覺性相聲皆悅機故無不歸者。

普清淨無盡福光菩薩摩訶薩。

疏九福普障無不淨稱真無盡故。

普光明相菩薩摩訶薩。

疏十相普無光相之光相徧益衆生故六相圓融思之。

海月光大明菩薩摩訶薩。

撰述
華嚴疏鈔卷一之三
疏二海月下。十異各菩薩。一海月光大明者。十德
十山皆依大海。十地十度皆依佛智。海中看月。淨
而且深。依智嚴利。深而且淨。如海卽大。如月卽明。
故名之。

雲音海光無垢藏菩薩摩訶薩。

疏二講如雷震。故曰雲音。辯才汎濫。猶如海光。又
海上有光。天涯無際。佛智起用。一念普周。淨惑無
窮。各無垢藏。

功德寶髻智生菩薩摩訶薩。

疏三修治二嚴。猶如淨寶。秘密高顯。故有髻言。

功德自在王大光菩薩摩訶薩。

疏四法王出現作用自在。二嚴圓滿。爲功德光。

善勇猛蓮華髻菩薩摩訶薩。

疏五勇猛化生不染化相。再法玄妙。如解髻珠。

普智雲日幢菩薩摩訶薩。

疏六慈雲智日。互相資映。長劫普應。高出如幢。

大精進金剛齋菩薩摩訶薩。

疏七堅利智慧。與精進俱。故得稱大。智爲行本。若
齋爲壽因。

香嚴光幢菩薩摩訶薩。

疏八戒等行發是爲香嚴種智高直故曰光幢
大明德深美音菩薩摩訶薩

疏九智光徧照是大明德稱真適物名深美音

大福光智生菩薩摩訶薩

疏十大智發光徧照佛境令福非福相所亦稱大
如是等而爲上首有十佛世界微塵數

疏二如是等下結畧顯廣

此諸菩薩往昔皆與毘盧遮那如來共集善根修苦
薩行皆從如來善根海生

疏第三此諸菩薩下攝德圓滿中二初別歎勝德

後總結多門初中亦二初二句就緣歎餘就行歎
今初初句往因同行顯主伴有由後句從德海生
明長爲輔翼言毘盧遮那者毘卽徧也盧遮那光
明照義廻就方言應云光明徧照然有二義一身
光徧照盡空法界乃至塵道二智光徧照真俗重
重法界身智能所合爲一身圓明獨耀具德無邊
故立斯號又毘者種種義盧遮障義那者盡義入
義卽種種障盡種種德圓故普賢觀經云釋迦牟
尼名毘那遮那徧一切處卽身亦徧非唯光徧又
云其佛住處各常寂光卽土亦光矣又云常波羅

密所攝成處。我波羅密所安立處。卽德圓義。又云淨波羅密滅有相處。卽障盡義。又云樂波羅密不任身心相處。不見有無諸法相處。卽證入義。又云如寂解脫。乃至般若波羅密。是色常住法故。明皆卽應卽真。爲本師矣。此經文證。本品當辯。鈔又毘者種種下。釋毘盧名。以梵語多舍。故有此釋。下後引經具釋。然彼經由普賢令行者懺悔。行人問云。我於何所懺悔。故有此教。今以疏間經。當總引經云。釋迦牟尼。名毘盧遮那。徧一切處。其佛住處。名常寂光。常波羅密所攝成處。我波羅密所安立

處。淨波羅密。滅有相處。樂波羅密。不得身心相處。不見有無諸法相處。如寂解脫。乃至般若波羅密。是色常住法故。但觀經文。自分經疏。

疏言共集善根。卽備道資糧。修菩薩行。卽作所應作。云何共集。互爲主伴故。主伴有三。一迴向主伴。二同行主伴。三如相主伴。皆稱共集。鈔主伴有三者。一迴向主伴。所修善根。互相迴向故。今成佛。遙爲主伴。二同行者。同修禪戒等行。三。二俱稱性。居然相收。

疏後句言善根海生者。謂佛德無邊。積妙法寶。智

撰述
聖嚴真金卷一之三
九
定盈洽。故稱爲海。從生有四。一。從自佛善根海生。謂已圓十身故。二。從本師海生。佛爲勝緣。曾已攝受授法。令行得成滿故。三。與遮那同於餘佛海生。以上云共集故。四。從法性佛海生。以上德海。諸佛共同平等一味。但稱性修。卽是從生。不揀自他故。梵本云。與佛同一善根海生。鈔謂佛德者。釋爲海義。卽金光明偈。彼經偈云。佛德無邊如大海。無限妙寶積其中。智慧德水鎮恒盈。百千勝定咸充滿。卽同海故。從自佛者。由普賢等自圓十身。十身之中。有如來身。依於佛身。起菩薩用。云從彼生。

諸波羅密悉已圓滿。

疏第二。諸波羅密下。就行德以歎。夫大士必崇德。廣業。虛心外身。崇德故進齊佛果。廣業故行彌法界。虛心故智周萬法而不爲。外身故。功流來際而非已。故德難名矣。鈔夫大士下。先彰歎意。先兩句標崇德廣業者。周易上繫云。子曰。易其至矣乎。夫易聖人所以崇德而廣業也。注云。窮理入神。其德崇也。兼濟萬物。其業廣也。次復云。智崇禮卑。崇效天。卑法地。注云。智以崇爲貴。禮以卑爲用。又云。盛德大業。至矣哉。富有之謂大業。日新之謂盛德。

撰述
華嚴疏鈔卷一之三
虛心外身者。卽老子意。彼云。虛其心。實其腹。弱其志。強其骨。又云。後其身。而身先。外其身。而身存。今借其言。謂菩薩虛曠其心。智絕能所。亡身爲物。一向利他。故下經云。菩薩所修功德行。不爲自己及他人。但以最上智慧心。利益衆生。故迴向。卽斯意也。

疏畧分爲三。一。明自分因行德。二。勝進果行德。三。二行無礙德。初中亦三。一。自利行圓。二。利他行滿。三。證理位極。今初有三句。一。諸度行圓。謂六度十度。八萬四千多劫積集。究盡事理。故云圓滿。

慧眼明徹等觀三世。

疏二。慧眼下。十眼明徹。分別名慧。照矚稱眼。障翳斯盡。智無不矚。故云明徹。五眼之中。慧眼觀理。理無異味。故云等觀。十眼之中。慧眼觀事。事無不見。故名等觀。是則委見其事爲明。深達其性爲徹。欲以一眼合諸。具通事理。但舉其慧。鈔五眼之中。一肉眼。二天眼。三慧眼。四法眼。五佛眼。釋相如離世間品。今唯取慧眼。十眼者。前五眼外。更加五眼。而業用多異。文云。所謂肉眼。見一切色故。天眼見一切衆生心。故慧眼見一切衆生諸根境界。故法

眼見一切法如實相故佛眼見如來十力故智眼見見諸法故光明眼見佛光明故出生死眼見涅槃故無礙眼所見無障故一切智眼見普門法故釋曰見諸根境界卽是見事卽五眼中法眼見同則明徹之言明配十眼中智徹配五眼中慧於諸三昧具足清淨。

疏三於諸下深定已滿三昧者此云等持遠離沉掉平等持心趣一境故而云諸者其餘諸緣亦一境故真如三昧爲其定體隨境入別塵數多端故云諸也橫則無定不窮豎則深入無際故云具足

定障永亡故云清淨。鈔豎則深入者法華云禪定智慧解脫三昧深入無際。

辯才如海廣大無盡。

疏第二辯才下利他行滿有三句卽三輪化益一語合四辯卽正教輪辯謂巧顯深理才謂巧應機宜萬法咸演則廣大無涯千難殊對則無竭盡故如海也又海遇風緣則洪浪雲涌智逢機請則口辯波騰請者旣許無邊辯亦廣大無盡。

具佛功德尊嚴可敬。

疏二具佛下身業神通輪謂三業無失智深叵撓。

爲具佛功德。故得外儀儼若。肅然可敬。知衆生根。如應化伏。

疏三知衆生下。意業記心輪。根義總明。文含性欲。言如應者。根有生熟。化不失時。器有大小。授法無謬。化謂教化。卽應攝受者。而攝受之。伏謂調伏。卽應折伏者。而折伏之。由此具行。入正法故。鈔卽應攝受下。卽勝鬘經文。由此具行。入正法故者。卽取意結之。彼云。折伏攝受。令正法久住。多折伏。剛強。攝受柔弱。

入法界藏。智無差別。

疏第三入法界藏下。證理位極。亦三句。一證理法。謂以大智證入平等真法界藏。依佛性論。說有五藏。一。如來藏。謂在纏含果法故。二。自性清淨藏。謂在纏不染。三。法身藏。謂果位爲功德所依。四。出世間上上藏。謂出纏超過二乘菩薩。五。法界藏。謂通因果。外持一切染淨有爲。故名法界。內含一切恒沙性德。故復名藏。此義寬通。故今證入。鈔依佛性論者。卽第二卷辯相分第四。自體相品第一中。有十義。第一自體相。牒云。相者有二種。一者別相。二者通相。別相有三。何者爲三。一者如意功德。二

撰述一
華嚴疏鈔卷一之三
用
者無異性。二者潤滑性。言如意功德者。謂如來藏有其五種。何等爲五。一。如來藏自性。是其藏義。一切諸法不出如來自性。無我爲相故。故說一切諸法爲如來藏。二者正法藏。因是其藏義。以一切聖人四念處等正法。皆取此性作境。未生得生。已生得滿。是故說名爲正法藏。三者法身藏。至得是其藏義。此一切聖人信樂正性。信樂願聞。由此信心。令諸聖人得於四德。乃過恒沙數等一切如來功德。故說此性名法身藏。四者出世藏。眞實是藏義。世有三失。一者對治可滅盡故。名爲世。此法則

支那
華嚴疏鈔卷一之三
用
無對治。故名出世。二不淨住。故名爲世。由虛妄心。果報念念滅不住故。此法不爾。故名出世。三由有倒見故。心在世間。則恒倒見。如人在三界。心中決不得苦法忍等。以其虛妄。名之爲世。此能出世間。故名眞實。爲出世藏。五者自性清淨藏。以秘密是其藏義。若一切法隨順此性。則名爲內。是正非邪。則爲清淨。若諸法違逆此理。則名爲外。是邪非正。名爲染濁。故言自性清淨藏。故勝鬘經云。世尊。佛性者。是如來藏。是正法藏。是法身藏。是出世藏。是自性清淨藏。由說此五藏義。故如意功德而得顯

撰述
華嚴師金卷一之三
現爲顯此義故說如意寶。譬如有人以宿業故感得如意寶珠。得此珠已。能隨其意。有所樂事。自然得成。佛性亦爾。由事善知識。修諸福慧。感得此性。便隨修行者意。各各自得三乘之果。故隨意功德。是其別相。釋曰。然疏引五藏卽賢首疏。其第五藏卽論第二正法藏是。名則小異。大旨則同。取其最後。順經法界義。故當第五。復名法界藏耳。然論正法藏云。因是其義。今疏云。通因果者。謂能與因果諸位功德爲因。故論云。一切聖人四念處等而爲因故。

疏言智無差別者。所證之藏平等。要無分別方契。此則智自無差。鈔所證之藏下。釋智無差別於中。分二。先正釋。然有三釋。連成一義。第一智自無差。如以圓蓋稱於圓函。今但論蓋圓耳。謂所證平等。故須無差別智。方證於理。若差別智。卽不能證。疏卽由上義。能所不殊。又此能證智。與所證藏。冥合一味。無有境智之異。故云無差。此復有二。一同無相故。下經云。無有少法爲智所入。亦無少智而入於法。二同法界故。則能所各互攝盡。故下云。無有智外。如爲智所入。智攝如盡故。亦無如外智能。

撰述
證於如。如全攝故。鈔卽由上義下。第二意能所
不殊無差。如魚符相合。又此下。明一味無差。如水
和乳。此復有二者。前卽真空一味。後卽妙有一味。
前卽無相。後卽法性。

疏若皆一味。豈令智同於境而無智耶。古德釋云。
智相盡故不有。能令智相盡故不無。不爾。豈令諸
相皆盡而智獨存。鈔智相盡故不有。則同如一
味。能令智相盡故不無。則智有功能。反照智空。不
取于智。斯爲真智。故不無智。不爾下反釋。反成不
有一味之義。

疏是故於境。則不碍真。而恒俗。於智。則不碍寂。而
恒照。卽境智非一。境則不碍俗。而恒真。智則不廢
照。而恒寂。卽境智非異。境則空有無二。智則寂照
雙融。故云無差別也。鈔是故下結成。於中先以
寂照對真俗二境。辯非一異。後境則空有下。結成
無差。

疏上來所釋。約真理寂寥。與止寂相順。俗諦流動。
與觀照相順。起信等中。且爲此釋。鈔上來所釋
下。二申今意。三初成昔解。明有文據。出於起信。爲
出論意。則令昔解未盡其源。謂前結成之中。於境

撰述
華嚴疏鈔卷一之三
不碍真而恒俗智則不碍寂而恒照。雖明不碍。若別對者。意以心寂對於境真。心照對於境俗。以照對俗。則心境非一。以寂對真。則心境非異。明是唯照對俗。唯寂對真。次雖雙融。空有二境。寂照二心。終不得言境則不碍俗而恒真。心則不碍照而恒寂。則心境非異。明知本意相對別也。故疏取其意。示論意云。真理寂寥。與止寂相順。俗諦流動。與觀照相順。言起信等者。出其所據也。等取瑜伽。及別經論。言起信中者。即彼修行信心中云。云何修行止觀門。所言止者。謂止一切境界相。隨順奢摩

他觀義故。所言觀者。謂分別因緣生滅相。隨順毘鉢舍那觀義故。云何隨順。以此二義漸漸修習。不相捨離。雙現前故。若修止者。住於靜處。端坐正意。不依氣息。不依形色。不依於空。不依地水火風。乃至不依見聞覺知。一切諸想。隨念皆除。亦遣除想。以一切法。本來無想。念念不生。念念不滅。亦不得隨心外念境界。後以心除心。心若馳散。即當攝來。住於正念。是正念者。當知唯心。無外境界。即復此心。亦無自相。念念不可得。若從座起。去來進止。有所施作。於一切時。常念方便。隨順觀察。久習純熟。

其心得住。以心住故。漸漸猛利。隨順得入真如三昧。釋曰。上皆論文。止中則知無相不生不滅。觀中常念方便。及分別因緣生滅。明是止順於理。觀順於事。又論下文云。復次若人唯修於止。則心沉沒。或起懈怠。不樂眾善。遠離大悲。是故修觀。修習觀者。當觀一切世間有爲之法。無得久停。須臾變壞。一切心行。念念生滅。以是故。訾等釋曰。上亦多就事明觀。又下論云。唯除坐時。專念於止。若餘一切。悉當觀察。應作不應作。止觀俱行。所謂離念諸法。自性不生。而復即念因緣和合。善惡之業。訾樂等

撰述

華嚴疏鈔卷一之三

三

三

報不失不壞。雖念因緣善惡業報。而亦即念性不可得。釋曰。此之雙行。亦明念自性不生。是止。念因緣和合。是觀。故疏出論意。真理寂寥。與止寂相順。俗諦流動。與觀照相順。而上云等取瑜伽者。瑜伽七十七中。亦說禪定有於三品。一奢摩他品。二毘鉢舍那品。三雙運品。大旨與起信多同。故致等言。疏未盡其源。以令照真。不得名照。照俗之時。不即寂故。鈔未盡其源下。次辯順違。文雖順論。不知諸論。且約一相。便將寂照。敵對真俗。故是有乖。以令照真下。出其有乖。所以由以寂對真。故單照真。

法那

華嚴疏鈔卷一之三

三

三

時無照。以照對俗故。單觀俗時無寂。故統收經論中意。或以理觀對於事止。謂契理止妄是也。或以事觀對於理寂。謂無念知境是也。或事觀對於事寂。謂觀於一境。心不動搖是也。或理觀對於理寂。忘心照極是也。畧舉其四。廣如賢首品。此猶約單觀。若約雙融事理。如下疏文。若依古釋。則全無事止。亦無理觀。云何更得三觀一心。三止齊運。若云約真。則境智無二。約俗。則境智非一。斯則有理。而其結云。境則空有無二。智則寂照雙融。明知還融。前照事之觀契理之寂耳。請細詳之。

疏今正釋者。謂言用則同而異。由境不能照智。有照故。言寂則異而同。境智無異味。故同故無心於彼此。忘心契合。故異故不失於照功。智異木石。故各真智證理。境則唯寂。智則寂而常照。鈔今正釋者下。三申正義。有四。初約證理以釋境智非一。異義卽肇公般若無知論中之意。而便以疏間而釋之。彼論先有難云。聖智之無。惑智之無。俱無生滅。何以異之耶。荅曰。聖智之無者。無知。惑智之無者。知無。其無雖同。所以無者異也。何者。夫聖心虛寂。無知可無。可曰無知。非謂知無。惑智有知。故

有知可無。可謂知無。非曰無知也。無知卽般若之無也。知無則真諦之無也。是以般若之與真諦。言用則同而異。言寂則異而同。同故無心於彼此。異故不失於照功。是以辯同者同於異。辯異者異於同。斯則不可得而異。不可得而同也。何者。內有獨鑒之明。外有萬法之實。萬法雖實。然非照不得。內外相與以成其照功。此則聖所不能同用也。內雖照而無知。外雖實而無相。內外寂然。相與俱無。此則聖所不能異寂也。是以經云。諸法不異者。豈曰續鳧截鶴。夷岳盈壑。然後無異哉。誠以不異於異。

故雖異而無異耳。故經云。甚奇世尊於無異法中。而說諸法異。又云。般若與諸法。亦不一相。亦不異相。信矣。釋曰。但觀上來所引論文。則疏之中。自分主客。但觀疏文。中間釋論。則論旨趣。居然可知。疏若約照俗。則以後得智照差別之境。

疏若約融真俗者。境則真俗不二。智則權實雙行。亦爲一味。而不失止。以雖雙行。而卽寂故。鈔若約融真俗者下。三約雙融。所以辯此者。自有二意。一者古德自科入法界。藏云。一證理法。故於止義。唯就理明。今此別明事理無碍。二者卽所證理。是

卽事之理不遮雙融。但上雙融。唯取權智對於真止。故爲非耳。故今不要以止對真。而智自有權實雙融。對真俗雙融。以與昔別。况云而不失止。則二智之上。自有二止。權智之上。有隨緣止。實智之上。有體真止。二止亦融。對上二智。卽止觀雙融。若融智境。方爲一味。

疏若約三觀及融境智。至下當辯。鈔若約三觀下。四約三觀說。謂空觀假觀中道觀。在心則空假中一心。對境無諦有諦中道第一義諦。三諦之境。三觀自有三止。空觀有體真止。假觀有隨緣止。中道觀有離二邊分別止。三止三觀。六法一時。以契一諦三諦之境。境智一味。則有九法。皆成一味。更有異門等。並如下說。

證佛解脫甚深廣大。

疏二證佛下。明證果法。言解脫者。謂作用自在。如不思議法品說。於一念中。建立三世一切佛事等。總有十種。廣如彼說。卽用而真。故甚深。用無涯畔。故廣大。上窮彼際。故云證也。鈔總有十種者。卽第四十七經末云。佛子。諸佛世尊。有十種無碍解脫。何等爲十。所謂一切諸佛。能於一塵現不可說。

撰述
不可說諸佛。出興於世。一切諸佛。能於一塵現不
可說不可說諸佛。轉淨法輪。一切諸佛。能於一塵
現不可說不可說衆生。受化調伏。一切諸佛。能於
一塵現不可說不可說諸佛。國土。一切諸佛。能於
一塵現不可說不可說菩薩授記。一切諸佛。能於
一塵現去來今一切諸佛。一切諸佛。能於一塵現
去來今一切世界種。一切諸佛。能於一塵現去來
今一切神通。一切諸佛。能於一塵現去來今一切
衆生。一切諸佛。能於一塵現去來今一切佛事。是
爲十。

能隨方便。入於一地。而以一切願海所持。恒與智俱。
盡未來際。

疏三。能隨下。明得位極。謂普賢身徧於六位。隨在
一位。以願海力持於一切。故舊經云。在於一地。普
攝一切諸地功德。今此文順西國。若順此方。應云。
能以方便隨入一地。以願海力攝持一切地也。然
有引梵本廣明。此中句數開合不同。不必應爾。何
者。夫譯梵爲唐。誠乃不易。苟文小左右。貴於旨不
乖中。若理不可通。則正之以梵本。譯人意近。則會
之以舊經。言異意同。何必廣引。鈔然有引梵本

撰述
聖嚴通鑰卷一之三
下。因釋此句。便彈古人有無益之文意云。如不獲已。須引梵文。若無異轍。何要繁引。因示體式。言譯梵爲唐。誠乃不易者。按道安法師云。譯梵爲秦。有五失本。三種不易。卽叡公摩訶般若經序所明。言五失本者。一梵語盡倒。而使從秦。一失本也。二梵經尚質。此方好文。傳可衆心。非文不合。二失本也。三梵經委悉。至於歎詠。叮嚀反覆。或三或四。不嫌其繁。而今裁斥。三失本也。四梵有義說。正似亂辭。尋說問語。文無以異。或千或百。刈而不存。四失本也。五事已全成。將更傍及。反謗前辭。已乃復說。而

悉除之。此五失本也。又三種不易。何者。然般若遲三達之心。覆面所演。聖必因時。時俗有險易。而刪古雅以適今時。一不易也。愚智天隔。聖人叵階。乃欲以千載之上。微言傳合百王之下。未俗。二不易也。阿難出經。去佛未久。尊者大迦葉。令五百六通迭察迭書。今雖千年。而以近意裁量。彼阿羅漢。乃競競若此。此生死人。而平平若此。豈將不知法者勇乎。斯三不易也。涉茲五失。逮三不易。譯梵爲秦。詎可不慎乎。今用此意。故云誠乃不易。苟文小左。右下。示譯方軌。先二句總令取意。卽什公意。叡公

撰述
聖屬正金卷一之三
摩訶般若波羅密經序云。執筆之次。三惟亡師五
失。三不易之誨。惕焉若厲。憂懼盈懷。雖復履薄臨
深。未足喻也。幸冀宗匠通鑒。文雖左右。而旨不違
中。遂謹受按譯。敢當此任。故會意譯經。姚秦羅什
爲最。若敵對翻譯。大唐三藏稱能。若理不可通下。
別示方軌。如下萬字非字。虛空無形。引梵以正。斯
引得矣。譯人意近。則會之以晉經者。如今經云。以
是發心。當得佛故。引晉經云。以是發心。卽是佛故。
譯人意。謂卽佛。恐濫果佛故。云當得。若爾。上云初
發心時。便成正覺。何異。卽佛。况下復云。卽得如來。

一身無量身等。豈唯當成爲是。是知卽佛。約圓融
門當成。但是行布之意。今以行布釋於圓融。故言
意近。須引晉經以成正理。又如出現品。菩提章云。
於一切義。無所觀察。但得寂義。故引晉經。解一切
義。則止觀具矣。如是等文。其類多矣。許可引斥。今
此文中。廣引梵本。言異意同。故成繁長。

疏言恒與智俱者。明智窮來際。文舍二義。一望前。
謂雖在因中。一地而願力持。一切地功德。皆與智
俱。盡未來際。不離一地。如一地。餘地亦爾。是故因
門盡於未來。但是。一一諸位菩薩。不見作佛時。二。

望後以盡未來之大智。入如來之果海也。雖有二義順前義勝。初自分因行德竟。

了達諸佛希有廣大秘密之境。

疏第二了達下。明勝進果行分二。一得果法。二起果用。今初有四句。一入佛密境。此有二意。一佛卽密境。以三業業具。非餘測故。謂非色現色。摩尼不能喻其多。非量現量。應持不能窮其頂。不分而徧。一多不足異其體。全法爲身。一毛不可窮其際。此身秘密也。佛言聲也。非近非遠。目連尋之無際。身子對而不聞。非自非他。若天鼓之無從。猶谷響而

緣發。無邊法海。卷之在一言。無內圓音。展之該萬類。是謂佛口密也。意則無私成事。等覺尚不能知。密之至也。皆廣大無涯。超絕奇特。故云希有。二佛之密境。謂卽一乘。如來知見禪定解脫深入無際。帝網之境。時乃說之。故云希有。久默斯要。甚爲秘密。又權實隱顯。唯佛方知。故云秘密。今洞見其源。故云了達。

善知一切佛平等法。

疏二善知下。入平等亦有二意。一佛佛平等。謂一切諸佛體性平等。法身無二故。智慧平等。德無增

攝述
聖嚴頂金卷一之三
三
減故內用平等。悲願普應故。二者佛所證法平等。即第一義。此二無二。稱此而了。故名善知。已踐如來普光明地。

疏三。已踐下。明得佛位。謂佛有十地。如大乘同性經說。一甚深難知廣明智德地。乃至第十名毘盧遮那藏海智地。此十同是佛地。約德用成別。今普光明當其第一。普即廣義。光明即明甚深難知。此文雖畧義在普中。舉初攝後。理實皆踐。又普光明亦十地之總。總不出於普法智光故。鈔如大乘等者。經云。一甚深難知廣明地。二清淨身分威嚴

不思議明德地。三善明月幢實相海藏地。四精妙金光功德神通智德地。五火輪威藏明德地。六虛空內清淨無垢燄光開相地。七廣勝法界藏明界地。八最勝普覺智藏能淨無垢徧無碍智通地。九無邊億莊嚴回向照明地。十毘盧遮那智海智藏地。釋曰。此上十地同是佛地。約用成別。廣有其相。具如彼經。入於無量三昧海門。

疏四。入於下。證佛三昧。謂海印等定。皆深廣如海。並通一實。故得稱門。

撰述
集衆法海。辯才善巧。轉不退輪。

於一切處皆隨現身。世法所行。悉同其事。總持廣大
疏第二。於一切下。明起果用。文有三業。一。現佛身
業。徧世同事。二。同佛意業。總持大法。三。得佛語業。
能轉法輪。不退有四。一。稱理不退。無改說故。二。應
機不退。無虛發故。三。利益不退。聞已必定故。四。制
伏不退。天魔外道不能動故。復有四種不退。謂信
位證念。今當第四念不退也。鈔不退有四等者。
此有兩種。四不退義。前義卽十地論。一向約利他
大用而說。後四不退。如常所辯。信謂十信已滿十

千劫故。亦是第六不退心也。位卽十住。第七不退
住。不退墮聲聞辟支佛地。故各位不退。證謂初地
已證眞如。已得不退念。卽八地上。念念入法流。
心心趣寂滅。故得不退。第二勝進果行德已竟。
一切如來功德大海。咸入其身。一切諸佛所在國土。
皆隨願往。已曾供養一切諸佛。無邊際劫。歡喜無倦。
一切如來得菩提處。常在其中。親近不捨。恒以所得
普賢願海。令一切衆生智身具足。

疏第三。一切如來下。二行無碍德。謂引攝佛德。不
碍修因故。文有五句。一。引攝佛德。然有二義。一則

行成攝果。二則諸佛同加。二一切下。隨佛徧生。不
揀淨穢也。三已曾下。供佛集福。十方無邊。三世無
際。此一切佛。皆供養故。歡慶有遇。不在福相。故長
時無厭。四一切下。長爲輔翼。義通真應。五恒以下。
悲願調生。不以偏小利物。唯以同體普願攝物。令
證菩提。方顯智體圓足。

成就如是無量功德。

疏第一成就下。總結多門。無德而稱也。菩薩之德
焉。言不可周。宜以類取。故云如是無量。鈔無德
而稱等者。此借論語泰伯篇言。子曰。泰伯其可謂

大至德也已矣。三以天下讓。民無德而稱焉。意云德
既至深。故不能稱歎也。謂泰伯卽武王伯祖。文王
之伯。弟名季歷。卽文王之父。合當泰伯長子承嫡。
知弟季歷必生聖子。讓而不受。託採藥於吳。故爲
至德。

信士錢體方陳龍振自捨弁募刻此一卷附

緣 錢尚質五錢 繆承華三錢 姚受恩

錢祖壽三錢 錢庚一錢 錢體國五錢

陳嘉言五錢 陳錫五錢 陳應科五錢

沈寂芳二錢 浦氏五錢 陳永齡五錢

氏一錢 張氏三錢 俞氏二錢 高氏一錢 路

大方廣佛華嚴經疏鈔卷一之三 終

支那

華嚴疏鈔卷一之三

終

撰述一

至嚴師錄卷一之三

五

月

發師清三六發萬初無玉發七發蜀體國正發八發發尚贊正發九發發承華三發十發批受恩
至嚴此方顯有體圓足

城策季盟必主聖于難而不受清料藥飲吳姑為
之自策各季盟唱文王之父合當泰自是于承融
鴉至難姑不須無燻也請泰自唱瓦王自顯文王
至難也自矣三以天不難與無感而釋意云

大方廣佛華嚴經疏鈔卷一之四

于闐國三藏沙門實叉難陀 譯

清涼山大華嚴寺沙門澄觀撰述

世王妙嚴品第一之一

疏第二異生衆中總三十九衆相從爲三第一雜

類諸神衆第二阿修羅下八部四王衆第三三十

三天下欲色諸天衆

復有佛世界微塵數執金剛神

疏今初有十九衆通名神者靈祇不測故文皆三

段第一標數辯類第二列名結數第三攝德圓滿

支那

華嚴疏鈔卷一之四

一

月

今第一金剛神衆初辯類中以執持此杵守護佛故然一一類皆通有所表如地表心地海表德海等觀其歎德則知通意今此表般若堅利導於衆行到彼岸故。

所謂妙色那羅延執金剛神。

疏二所謂下列名結數然諸衆立名皆隨所得法門爲物立稱一那羅延者此云堅固由見佛妙色皆不可壞故受此名。鈔那羅延者取下得法以釋此名下經云妙色那羅延執金剛神得見如來示現無邊色相身解脫門偈云汝應觀法王法王法如是色相無有邊普現於世間。

日輪速疾幢執金剛神。

疏二見佛身毛猶如日輪現種種光速摧障惱故名曰幢。鈔見佛者下經云日輪速疾幢執金剛神得佛身一一毛孔如日輪現種種光明雲解脫門偈云佛身一一毛光網不思議譬如淨日輪。普照十方國舉此爲例下皆準之欲具釋者但看下經名義俱了餘三十八衆例此可知。

須彌華光執金剛神。

疏三見佛身光映蔽一切猶如須彌顯於大海神

撰述
華嚴疏鈔卷一之四
通等法如華開敷故。

清淨雲音執金剛神。

疏四圓音隨類如雷震故。

諸根美妙執金剛神。

疏五現爲世主以美妙根令物悟故。

可愛樂光明執金剛神。

疏六智光演法令愛樂故。

大樹雷音執金剛神。

疏七寶飾妙相如華嚴樹方便警物如雷震音。

師子王光明執金剛神。

疏八福深相妙炳著光明如師子王處衆無畏。

密談勝目執金剛神。

疏九慈眼視物爲吉祥目神通之談密現物前故。

蓮華光摩尼髻執金剛神。

疏十雨此嚴具及光明故。

如是等而爲上首有佛世界微塵數。

疏如是等結數下諸衆皆類此知至得法處各當

自顯恐厭繁文下畧不釋。

皆於往昔無量劫中恒發大願願常親近供養諸佛隨願所行已得圓滿到於彼岸。

疏第三皆於下。攝德圓滿十句分二。初二句總彰願行。由昔願力得預法會。常爲親侍。由今行滿。故能徧侍。

積集無邊清淨福業。於諸三昧所行之境悉已明達。獲神通力。隨如來住。入不思議。解脫境界。處於衆會。威光特達。隨諸衆生所應現身而示調伏。一切諸佛化形所在皆隨化往。一切如來所住之處常勤守護。疏後積集下。別顯滿相。一。福積淨業。二。智達定境。事定之境。隨事百千。理定之境。卽眞如實相。不思議定。則以無碍而爲其境。今皆智照。故云明達。三。

通隨佛住。四。入用難思。五。處衆超絕。六。應物調生。七。隨佛化形。八。護法住處。文並可知。復有佛世界微塵數身衆神。

疏第二身衆神。文三。向前初辯類有二義。一身謂神之自身。衆則同生同名。及所隨者。凡有其一。必更有二。共有其三。三故名衆。能所合目。各身衆神。二約所主。謂此類神。專以變化多身爲佛事故。鈔衆卽同生同名者。謂左右肩童子。

所謂華髻莊嚴身衆神。光照十方身衆神。海音調伏身衆神。淨華嚴髻身衆神。無量威儀身衆神。最上光

撰述
嚴身衆神。淨光香雲身衆神。守護攝持身衆神。普現攝取身衆神。不動光明身衆神。如是等而爲上首。有佛世界微塵數。皆於往昔成就大願。供養承事一切諸佛。

疏所謂下二名三德。文並可知。復有佛世界微塵數足行神。

疏第三足行神。亦有二義。一謂依止足行衆生及守護故。如下善見比丘足行之神。持華承足。故下德中戀仰如來。二足所行處。卽道路神。通表修行履佛所行故。

所謂寶印手足行神。蓮華光足行神。清淨華髻足行神。攝諸善見足行神。妙寶星幢足行神。樂吐妙音足行神。旃檀樹光足行神。蓮華光明足行神。微妙光明足行神。積集妙華足行神。如是等而爲上首。有佛世界微塵數。皆於過去無量劫中親近如來。隨逐不捨。復有佛世界微塵數道場神。

疏第四道場神。從所依所守得名。下諸神衆類皆同此。言道場者。非唯護佛道場。但有莊嚴道場之處。卽於中護。故下德中願供養佛。表護萬行道場及修行者故。

所謂淨莊嚴幢道場神。須彌寶光道場神。雷音幢相道場神。雨華妙眼道場神。華纓光髻道場神。雨寶莊嚴道場神。勇猛杳眼道場神。金剛彩雲道場神。蓮華光明道場神。妙光照耀道場神。如是等而爲上首。有佛世界微塵數。皆於過去值無量佛。成就願力。廣興供養。

復有佛世界微塵數王城神。

疏第五王城神。表行德防禦法城。心城故。如摩耶處說。

所謂寶峯光耀王城神。妙嚴宮殿王城神。清淨喜寶

王城神。離憂清淨王城神。華燈燄眼王城神。燄幢明現王城神。盛福光明王城神。清淨光明王城神。香髻莊嚴王城神。妙寶光明王城神。如是等而爲上首。有佛世界微塵數。皆於無量不思議劫嚴淨如來所居宮殿。

疏德中。以已德行嚴佛宮殿者。一佛殿爲所守之。最瑩飾爲尊佛故。二王伴善根互融攝故。三瑩飾自心佛安處故。

復有佛世界微塵數王地神。

疏第六王地神。表深重願荷負行德故。亦表心地。

爲依持故。

所謂普德淨華主地神。堅福莊嚴主地神。妙華嚴樹主地神。普散衆寶主地神。淨目觀時主地神。妙色勝眼主地神。香毛發光主地神。悅意音聲主地神。妙華旋髻主地神。金剛嚴體主地神。如是等而爲上首。有佛世界微塵數。皆於往昔發深重願。願常親近諸佛如來。同修福業。

復有無量主山神。

疏第七主山神。通表萬德高勝。性皆閑寂。別表智德最高。故德中云。得清淨眼。名中多有光稱。

所謂寶峯開華主山神。華林妙髻主山神。高幢普照主山神。離塵淨髻主山神。光照十方主山神。大力光明主山神。威光普勝主山神。微密光輪主山神。普眼現見主山神。金剛密眼主山神。如是等而爲上首。其數無量。皆於諸法得清淨眼。

復有不可思議數主林神。

疏第八主林神。表以無漏智導於衆行。森聳建立。故德中云。皆有可愛光明。

所謂布華如雲主林神。擢榦舒光主林神。生芽發曜主林神。吉祥淨葉主林神。垂布蔽藏主林神。清淨光

撰述
垂肩真經卷一之四
明王林神。可意雷音王林神。光香普徧王林神。妙光
迴耀王林神。華果光味王林神。如是等而爲上首不
思議數皆有無量可慶光明。

復有無量王藥神。

疏第九王藥神。表行德伏惑。資益法身。若約利他。
則三業不空。如藥樹王。故下德中。性皆離垢。卽伏
惑去病也。仁慈祐物。卽進善補益也。名中總名王
藥。藥旣不同。神神各別。吉祥者。王香茅之類也。清
淨光明。謂乳石之流。名稱普聞。如藥樹王。雪山忍
草等。明見十方。謂眼藥等。約法準之。

所謂吉祥王藥神。旃檀林王藥神。清淨光明王藥神。
名稱普聞王藥神。毛孔光明王藥神。普治清淨王藥
神。大發吼聲王藥神。蔽日光幢王藥神。明見十方王
藥神。益氣明目王藥神。如是等而爲上首。其數無量。
性皆離垢。仁慈祐物。

復有無量王稼神。

疏第十王稼神。稼者。樹五穀也。表萬行法味資益。
自他。他益稱心。故德中大喜成就。

所謂柔軟勝味王稼神。時華淨光王稼神。色力勇健
王稼神。增長精氣王稼神。普生根果王稼神。妙嚴環

撰述
華嚴疏鈔卷一之四
髻王稼神潤澤淨華王稼神成就妙香王稼神見者
慶樂王稼神離垢淨光王稼神如是等而爲上首其
數無量莫不皆得大喜成就

復有無量王河神

疏十一王河神卽河伯之流也表法河流注澗盆
羣品又於生死瀑流拯彼漂溺江河淮濟清濁俱
河故生死法流此神皆王鈔第十一河神卽河
伯之流者外典說爲河伯故莊子秋水篇云秋水
時至百川灌河涇流之大兩涘渚涯之間不辨牛
馬言其廣也於是焉河伯忻然自喜以天下之美

爲盡在已順流而東行至於北海東面而視不見
水端於是焉河伯始旋其面目望洋向若而歎曰
野語有之曰聞道百以爲莫己若者我之謂也釋
曰若卽海若海神名也如下引之皆此章具今但
取名河伯亦名馮夷故洛神賦云馮夷鳴鼓女媧
清歌

所謂普發迅流王河神普潔泉澗王河神離塵淨眼
王河神十方徧吼王河神救護衆生王河神無熱淨
光王河神普生歡喜王河神廣德勝幢王河神光照
普世王河神海德光明王河神如是等而爲上首有

撰述一 華嚴疏鈔卷一之四 九
無量數皆勤作意利益衆生。

疏德中勤益生者。謂遇洪流則平波息浪。逢沂泳則微動輕風。水性之屬深止而住居。陸行之流富生而應。采導百川而去害。灌萬頃而開利。爲勤作意利益衆生。約所表法隨意消息。

復有無量至海神。

疏十二。至海神。卽海若之輩。表具含萬德。一一深廣也。

所謂出現寶光至海神。成金剛幢至海神。遠離塵垢至海神。普水宮殿至海神。吉祥寶月至海神。妙華龍

髻至海神。普持光味至海神。寶燄華光至海神。金剛妙髻至海神。海潮雷音至海神。如是等而爲上首。其數無量。悉以如來功德大海充滿其身。

疏名中三名。遠塵離垢者。瑜伽八十六云。現斷煩惱。離故遠塵。彼隨眠離繫。故離垢。今約近事。塵謂塵境。垢卽煩惱。六根對境了彼性空。故曰遠塵。衆惑不行。誠爲離垢。心境相籍。離垢由於遠塵。

復有無量至水神。

疏十三。至水神者。通上河海等水。及雨露霜雪等也。表法水含潤等多義理故。

撰述
所謂普興雲幢主水神。海潮雲音主水神。妙色輪髻
主水神。善巧漩瀆主水神。離垢香積主水神。福橋光
音主水神。知足自在主水神。淨喜善音主水神。普現
威光主水神。吼音徧海主水神。如是等而爲上首其
數無量。常勤救護一切衆生而爲利益。

疏德中。拯溺爲救。濟危爲護。謂已溺邪見貪婬水
者救之。將沉者護之。而爲利益。卽雲雨等潤。發生
萬物也。法合可知。

復有無數主火神。

疏十四。主火神。卽宋無忌之流也。以顯智慧火。燒

煩惱薪。成熟善品。破無明暗耳。

所謂普光醯藏主火神。普集光幢主火神。大光普照
主火神。衆妙宮殿主火神。無盡光髻主火神。種種談
眼主火神。十方宮殿如須彌山主火神。威光自在主
火神。光明破暗主火神。雷音電光主火神。如是等而
爲上首不可稱數。皆能示現種種光明。令諸衆生熱
惱除滅。

疏德中。夫火有二能。一能爲益。二能爲損。今用益
止損。表法亦爾。示慧光以去闇。用益也。除惑罣之
熱惱。止損也。

復有無量王風神。

疏十五。王風神。通表方便無任。無所不摧。別表如下。

所謂無礙光明。王風神。普現勇業。王風神。飄擊雲幢。王風神。淨光莊嚴。王風神。力能竭水。王風神。大聲徧吼。王風神。樹杪垂髻。王風神。所行無礙。王風神。種種宮殿。王風神。大光普照。王風神。如是等而爲上首。其數無量。皆勤散滅我慢之心。

復有無量王空神。

疏十六。王空神。表法性空。別卽離染周徧等。亦各

如名辨。

所謂淨光普照。王空神。普游深廣。王空神。生吉祥風。王空神。離障安住。王空神。廣步妙髻。王空神。無礙光。王空神。無礙勝力。王空神。離垢光明。王空神。深遠妙音。王空神。光徧十方。王空神。如是等而爲上首。其數無量。心皆離垢。廣大明潔。

疏德中。若情塵亂起。翳本性空。智日高昇。則情雲自卷。空有日而廓爾。無際。智合理而杳然無涯。故

云爾耳。

復有無量王方神。

撰述

華嚴疏鈔卷一之四

七

支那

華嚴疏鈔卷一之四

七

撰述

華嚴疏鈔卷一之四

三

疏十七主方神。卽東方青帝等類也。表顯邪正方。隅使行無迷倒。鈔卽東方者。此主五方有五帝。東方甲乙木。其色青。故東方爲青帝。南方丙丁火。其色赤。爲赤帝。西方庚辛金。其色白。爲白帝。北方壬癸水。其色黑。爲黑帝。中央戊己土。其色黃。爲黃帝。若十二神。卽一方有三故。故成十二。大集經說十二獸。皆是大菩薩。示迹爲之。如彼經說。

所謂徧住一切主方神。普現光明主方神。光行莊嚴主方神。周行不礙主方神。永斷迷惑主方神。普遊淨空主方神。大雲幢音主方神。髻目無亂主方神。普觀

世業主方神。周徧遊覽主方神。如是等而爲上首。其數無量。能以方便。普放光明。恒照十方。相續不絕。

疏德中身智教光。無不引攝。各普放也。無時不放。所以稱恒。如日周天。故相續不絕。

復有無量主夜神。

疏十八主夜神。表於無明黑闇。生死長夜。導以慧明。令知正路。

所謂普德淨光主夜神。喜眼觀世主夜神。護世精氣主夜神。寂靜海音主夜神。普現吉祥主夜神。普發樹華主夜神。平等護育主夜神。遊戲快樂主夜神。諸根

皮那

華嚴疏鈔卷一之四

三

撰述
華嚴疏鈔卷一之四
常喜王夜神出生淨福王夜神如是等而爲上首其數無量皆勤修習以法爲樂

疏德中夜分忘寢是日勤修翻彼長迷故以法爲樂

復有無量王晝神

疏十九王晝神於晝攝化顯行德恒明也

所謂示現宮殿王晝神發起慧香王晝神樂勝莊嚴王晝神香華妙光王晝神普集妙藥王晝神樂作喜目王晝神普現諸方王晝神大悲光明王晝神善根光照王晝神妙華纓絡王晝神如是等而爲上首其

數無量皆於妙法能生信解恒共精勤嚴飾宮殿

疏德中先修正解後勤正行有信無解增長無明

有解無信還生邪見信因解淨解籍信深晝之義也上來多王器界故但各神準梵本除金剛神餘皆女神表慈育故菩薩同於彼類以攝衆生自下攝領有情皆受王稱並是丈夫

復有無量阿修羅王

疏第二八部四王衆文有八段前四雜類後四能

統是天王所統是八部今初阿修羅亦云阿素落梵音楚夏耳婆沙譯爲非天佛地論云天趣所攝

以多行諂媚無天實行。故曰非天。依阿毘曇亦鬼趣攝。諂曲覆故。正法念經鬼畜二攝。以羅睺阿修羅。是師子子故。伽陀經天鬼畜攝。具上說故。由此或開六趣。或合爲五。多好鬪諍。懷勝負故。或居衆相山中。或居海下。如正法念說。然有大力者。廣修福故。今之修福。有懷勝負諂媚心者。多生其中。鈔依阿毘曇亦鬼趣攝者。若依雜心第八修多羅品。亦畜生趣攝。有言阿修羅與天同趣。是故說言。汝先是天。問若然。何不見天帝耶。答諂曲所覆。故有說是大力餓鬼天趣。不攝故。問若爾。釋天云何。

與相習近耶。答天貪色故。勝負多故。

所謂羅睺阿修羅王。毘摩質多羅阿修羅王。巧幻術阿修羅王。大眷屬阿修羅王。大力阿修羅王。徧照阿修羅王。堅固行妙莊嚴阿修羅王。廣大因慧阿修羅王。出現勝德阿修羅王。妙好音聲阿修羅王。如是等而爲上首。其數無量。

疏羅睺此云攝惱。以能將手隱攝日月。令天惱故。二毘摩此云絲也。質多羅種種也。謂此王能以一絲幻作種種事故。

悉已精勤摧伏我慢。及諸煩惱。

疏德中實者因果俱慢故權應偏摧非不斷餘故云及也

復有不可思議數迦樓羅王

疏二迦樓羅昔云金翅正云妙翅以翅有種種寶色莊嚴故此就狀翻若敵對翻此云大嚙項以常著龍於嚙中故此鳥能食龍魚七寶然鳥及龍各具四生謂卵胎濕化後後勝前前劣不能食勝謂卵生鳥不能食胎等勝能噉劣化食四生如增一辨以化食化斃得充虛亦表菩薩攝生故離世間品云菩薩迦樓羅如意爲堅足乃至搏撮人天龍

安置涅槃岸 鈔化食四生者化最勝故濕生鳥食濕胎卵三生龍胎生鳥食胎卵二生龍卵生鳥唯食卵生龍然劣不能食勝若有食者其鳥卽死而可食者日食一龍王五百小龍繞四天下周而復始次第取食其鳥命將盡時至海取龍爲龍吐毒復不能食饑火所燒聳翅入海直下至風輪際爲風所吹還復却上如是七返無處停足遂至金剛山頂命終以食龍故其身毒氣發火自燒難陀龍王恐燒寶山降雨滅火滴如車軸其身肉消散唯有心在大如人脍紺瑠璃色輪王得之用爲珠

寶帝釋得之爲髻中珠亦表菩薩下約表以釋引
文云乃至者彼經具云菩薩迦樓羅如意爲堅足
方便勇猛超慈悲明淨眼住一切智樹觀三有大
海搏撮天人龍安置湏臾盤岸

所謂大速疾力迦樓羅王。

疏大速疾力者增一中說此鳥食龍從金剛山頂
鐵杈樹下入海取龍水未合間還至本樹是爲速
疾。

無能壞寶髻迦樓羅王清淨速疾迦樓羅王心不退
轉迦樓羅王大海處攝持力迦樓羅王

疏大海處攝持力者卽是攝彼命將盡者食之而
龍受三歸及袈裟一縷在身則不可取菩薩亦爾
如前引離世間品說又出現云取善根熟衆生置
佛法中此爲命盡若心有邪歸斷見所覆則不可
取鈔而龍受三歸者菩薩處胎經佛自說昔爲
金翅鳥七寶宮殿等時入大海求龍爲食時彼海
中有化生龍龍子八日十四日十五日受如來齋
八禁戒法時鳥銜龍出海金翅鳥法若食龍時先
從尾吞求尾不得已經日夜明日龍出尾示金翅
鳥云化生龍者我身是也我若不持八關齋法者

撰述
華嚴經金卷一之四
汝可食我。我奉齋戒。汝屈滅我。金翅聞已。悔過自責。云。佛之威神甚深難量。請龍入宮。龍卽隨入。乃請龍受八戒。一縷在身。卽觀佛三昧海經。又出現下卽彼如來行中。金翅翹海喻。喻如來無碍行。經云。佛子。譬如金翅鳥王。飛行虛空。回翔不去。以清淨眼觀察海內諸龍宮殿。奮勇猛力。以左右翅鼓揚海水。悉令兩闢。知龍男女命將盡者。而搏取之。如來應正等覺。金翅鳥王亦復如是。任無碍行。以淨佛眼觀察法界諸宮殿中一切衆生。若種善根已成熟者。如來奮勇猛十力。以止觀兩翅鼓揚生

死大愛海水。使其兩闢而撮取之。置佛法中。令斷一切妄想戲論。安住如來無分別無礙行。釋曰。觀前經文。自知廣畧。下釋救攝。引出現品。亦是此文。堅固淨光。迦樓羅王。巧嚴冠髻。迦樓羅王。普捷示現。迦樓羅王。普觀海。迦樓羅王。

疏。普觀海者。卽周四天下。求命盡龍。普音廣目。迦樓羅王。如是等。而爲上首。不思議數。悉已成。就大方便力。善能救攝一切衆生。

疏。德中。大方便力。卽雖了衆生空。而能入有。是十力止觀也。普能救攝。卽鼓生死大愛海水。取善根

熟者如出現品說。
復有無量緊那羅王。

疏三緊那羅者。此云疑神。謂頂有一角。形乃似人。面極端正。見者生疑。爲是人耶。爲非人耶。因此立稱。依雜心論。畜生道攝。亦云歌神。以能歌詠。是天帝執法樂神。卽四王眷屬。表菩薩示衆生形。而非衆生。常以法樂娛衆生故。鈔亦云歌神。卽唐三藏譯。

所謂善慧光明天緊那羅王。妙華幢緊那羅王。種種莊嚴緊那羅王。悅意吼聲緊那羅王。寶樹光明緊那羅王。見者欣樂緊那羅王。最勝光莊嚴緊那羅王。微妙華幢緊那羅王。動地力緊那羅王。攝伏惡衆緊那羅王。如是等而爲上首。其數無量。皆勤精進。觀一切法。心恒快樂。自在遊戲。

疏德中要勤觀察。則得法樂。治神。自他兼樂。爲自在遊戲。

復有無量摩睺羅伽王。

疏四摩睺羅伽者。此云大腹行。卽蟒之類。亦表菩薩徧行一切而無行也。

所謂善慧摩睺羅伽王。清淨威音摩睺羅伽王。勝慧

莊嚴髻摩睺羅伽王妙目王摩睺羅伽王如燈幢爲
衆所歸摩睺羅伽王最勝光明幢摩睺羅伽王師子
臆摩睺羅伽王衆妙莊嚴音摩睺羅伽王須彌堅固
摩睺羅伽王可變樂光明摩睺羅伽王如是等而爲
上首其數無量皆勤修習廣大方便令諸衆生永割
癡網。

疏德中此類聾駃故令方便捨癡。

復有無量夜又王。

疏五夜又王初一是北方天王卽毘沙門是也若
從能領是天衆攝今從所領爲名然四王各領二

部從一立稱夜又此云輕捷飛空速疾故亦云若
活。此天又領一部各羅刹。此云可畏。

所謂毘沙門夜又王自在音夜又王嚴持器仗夜又
王大智慧夜又王酸眼王夜又王金剛眼夜又王勇
健臂夜又王勇敵大軍夜又王富資財夜又王力壞
高山夜又王如是等而爲上首其數無量。

疏名中云毘沙門者。此云多聞以福德之名聞四
方故。此一是天夜又之王。餘九是夜又。夜又卽王。
雖一是天。又從所領。况九皆夜又。故非天衆。下三
例然如龍中娑竭羅王豈是天耶。

皆勤守護一切眾生。

疏德中。此類飛空噉人。故菩薩示爲其王。翻加守護。亦令夢見羅刹。不害法身慧命。鈔亦令夢見者。涅槃十一。浮囊喻中。羅刹乞浮囊。合以夢見羅刹。謂一切眾生。或因貪愛煩惱。破戒。如有人明信因果。正見在懷。但爲惑纏。遂破禁戒。名夢羅刹。二者以見不正。撥無因果。起諸邪見。斷常等見。便破禁戒。謂破無罪。名見羅刹。但彼令破戒。此害慧命。以之爲異。羅刹義同。

復有無量諸大龍王。

疏六龍王。亦初一是天。卽西方天王。

所謂毘樓博叉龍王。娑竭羅龍王。

疏毘樓博叉。唐三藏譯云。醜目。毘樓醜也。博叉目也。日照三藏譯云。毘徧也多也。樓者。具云。嚕波。此云色也。博吃叉。此云諸根也。謂眼等諸根。有種種色。故以爲名。此不必醜。此王主二部。謂龍及富單那。富單那者。此云熱病鬼也。娑竭羅。此云海也。於大海中。此最尊故。獨得其名。

雲音妙幢龍王。醯口海光龍王。普高雲幢龍王。德叉迦龍王。

撰述
疏德又迦舊云多舌。以嗜語故。正云能害。害於所
害。德又者。能害也。迦者。所害也。謂若瞋。噓視。人畜
皆死。

無邊步龍王。清淨色龍王。普運大聲龍王。無熱惱龍
王。

疏無熱惱者。卽阿耨達池之龍也。諸龍有四熱惱。
今皆離故。四熱至下當釋。智論云。此龍是七地菩
薩。須彌藏經云。是馬形龍王。又一切龍。總有五種
形類。一象形。善住龍王爲王。二蛇形。難陀龍王爲
王。三馬形。阿那婆達多龍王爲王。四魚形。婆樓那

龍王爲王。五蝦蟇形。摩那斯龍王爲王。鈔須彌
藏者。經有兩卷。此卽下卷功德天自敘云。我與世
尊。往昔於因陀羅幢相王佛所。同時發誓願。今願
悉滿。心意滿足。是故如來出現於世。我今得在功
德之處。我今雖復在功德處。猶未圓滿。昔本誓願
何以故。此處多有象龍。下卽義引。謂惡龍惱害衆
生。請佛除滅。佛告須彌藏龍仙菩薩云。汝於往昔
然燈佛所。爲化諸龍。起大勇猛。今四生龍。有於惡
毒氣。毒見毒觸。毒齧。毒貪。瞋。癡。毒。云何當令如法
除滅。彼菩薩答我入其窟。入深三昧。彼當降伏。廣

撰述
說竟云我從阿僧祇劫勇猛精進故能教化一切衆生。此諸龍王於大乘法精進修行。謂此善在龍王爲一切象形龍王。此難陀龍王爲一切虵形龍王。此阿耨達龍王爲一切馬形龍王。此婆樓那龍王爲一切魚形龍王。此摩那蘇婆帝龍王爲一切蝦蟇形龍王。如是等諸大龍王能與衆生作諸衰惱。自餘諸龍自力不堪作上衰患。此五大龍安住大乘有大威德。是大龍王。各各佛前率諸眷屬。不令起作如上災禍。於佛法僧三寶種性久住於世。不令速滅。

如是等而爲上首。其數無量。莫不勤力興雲布雨。令諸衆生熱惱消滅。

疏德中外則雲行雨施。散去炎毒。內則慈雲廣被。法雨普霑。散業惑之熱惱。鈔德中雲行雨施者。語出周易乾卦。彖曰。大哉乾元。萬物資始。乃統天。雲行雨施。品物流形。大明終始。六位時成。時乘六龍以御天。乾道變化。各正性命。保合大和。乃利貞。首出庶物。萬國咸寧。釋曰。乾爲龍也。六爻皆龍。今釋於龍。宜取乾德。况雲行雨施。復有無量鳩槃茶王。

疏七鳩槃茶王。

所謂增長鳩槃茶王。龍王鳩槃茶王。善莊嚴幢鳩槃茶王。普饒益行鳩槃茶王。甚可怖畏鳩槃茶王。美目端嚴鳩槃茶王。高峰慧鳩槃茶王。勇健臂鳩槃茶王。無邊淨華眼鳩槃茶王。廣大天面阿修羅眼鳩槃茶王。如是等而爲上首其數無量。

疏初。是南方天王。卽毘樓勒叉。此云增長王。謂能令自他善根增長故。此王更領一部謂辟荔多。辟荔多者。此云魘魅鬼。餘如音義。鈔餘如音義者。前後不多引音義。以鳩槃茶。此譯爲陰囊。其狀

稍偃。故指在音義耳。舊云冬於鬼。亦以狀翻。

皆勤修學無礙法門。放大光明。

疏德中。此類障碍深重。故偏明無碍。自學權實無碍。法界智光以利衆生。

復有無量乾闥婆王。

疏八乾闥婆。此云尋香。謂諸樂兒。不事生業。但尋諸家飲食香氣。卽往設樂。求食自活。因此世人號諸樂人爲乾闥婆。彼能執樂。故以名焉。亦云食香。止十寶山間食諸香料。卽帝釋執樂神也。帝釋須樂。此王身有相現。

撰述 聖賢通鑑卷一之四
所謂持國乾闥婆王樹光乾闥婆王淨目乾闥婆王華冠乾闥婆王普音乾闥婆王樂搖動妙目乾闥婆王妙音師子幢乾闥婆王普放寶光明乾闥婆王金剛樹華幢乾闥婆王樂普現莊嚴乾闥婆王如是等而爲上首其數無量。

疏提頭賴吒卽東方天王。此云持國謂護持國土安衆生故。此從所領爲名。更領一部名毘舍闍。此云噉精氣。謂噉有情及五穀精氣故。皆於大法深生信解。歡喜愛重。勤修不倦。

疏德中大法卽大緣起法也。信解故歡喜。深心故愛重。旣歡旣重。故不替修行。二八部四王衆竟。○疏第三月天子下十二段。明欲色諸天衆。天者自在義。光明義。清淨義。智論云。天有三種。一。人天。謂帝王。二。生天。謂欲色等。三。淨天。謂佛菩薩第一義天。今通後二。然諸天壽之長短。身之大小。衣服輕重。宮殿勝劣。俱舍十一。及瑜伽等論起世等經。皆廣辯之。文繁不敘。鈔然諸天壽者。俱舍世品云。人間五十年。下天一晝夜。乘斯壽五百。上五倍倍增。色無晝夜殊。劫數等身量。無色初二萬。後後二二增。言身量者。頌云。欲天俱盧舍。四分一一增。色

撰述
聖賢錄卷一之四
天踰繕那。初四增半半。此上增倍倍。唯無雲。減三。釋曰。俱盧舍。卽二里。踰繕那。卽十六里。以八俱盧舍爲一踰繕那。則四天王身長半里。至第六天身長三里。以半里半里增故。有引三法度經云。切利天身長一由旬。衣二由旬。廣一由旬者。以彼誤譯。里爲由旬。不知彼失。故妄引耳。四天王天半里。切利天則一里。餘可例知。上云劫數等身量者。色界梵衆天身長半由旬。則人壽半劫。餘可例知。云初四增半半者。二梵輔天則一由旬。三大梵則一由旬半。四少光則二由旬。此上諸天皆倍倍增。唯

無雲天。減三由旬。所以減者。畧出一意。唯無量光天四由旬。光音則八。少淨十六。無量淨三十二。徧淨六十四。至無雲天合有一百二十八。減却三由旬。有一百二十五。此上七天。倍倍增之。至色究竟天。欲成一萬六千劫。故則身長一萬六千由旬。又云少光上下天。大全半爲劫。謂少光已上大全爲劫。謂八十中劫爲一劫也。自下諸天大半爲劫。卽四十中劫爲一劫也。言中劫者。卽一增一減劫也。言衣服輕重者。四天王衣十二銖。切利六銖。夜摩三銖。兜率一銖半。化樂一銖。他化半銖。上皆減半

撰述 聖嚴師金卷一之四
也。言宮殿等殊者。月天長阿舍云。其城正方一千九百六十里。高下亦爾。二分天金。一分瑠璃。王座二十里。遙看似圓。而實正方。日天同此。但量加半。由旬。三十三天中宮。各善現。周萬踰繕那。高一半。金城雜飾。其地柔軟。中有殊勝殿。周千踰繕那。此上諸天。皆倍倍勝。可以意得。今但畧消各意。故指廣在餘。

復有無量月天子。

疏文中先有七段。明欲界天。後有五段。明色界天。前中卽分爲七。今初月天子。月者。缺也。有虧缺故。

下面頰。抵迦寶水精所成。能冷能照。表菩薩得清涼慈。照生死夜。如云菩薩清涼月等。

所謂月天子。華王髻光明天子。衆妙淨光明天子。安樂世間心天子。樹王眼光明天子。示現清淨光天子。普遊不動光天子。星宿王自在天子。淨覺月天子。大威德光明天子。如是等而爲上首。其數無量。

疏名中。初一是總。雖標總稱。卽受別名。下皆準此。皆勤顯發衆生心寶。

疏德中。顯發衆生心寶者。水珠見月。則流潤發光。淨心遇緣。則慈流智發。生了旣發。正因顯然。生由

性成則了非外入。生與不生無二。發乃發其本心。故顯發雙辨。

復有無量日天子。

疏二。日天子。日者實也。常充實故。下面亦頗胝迦。寶火精所成。能熱能照。表菩薩智照故。又日以陽德。月以陰靈。一能破闇。表根本破惑。一能清涼。表後得益物。又依寶性論。法日有四義。一破闇如慧。二照現如智。三輪淨如解脫。四上三不相離。如同法界也。鈔又日以陽德。月以陰靈。卽文選月賦中言。

所謂日天子。光燄眼天子。須彌光可畏敬幢天子。離垢寶莊嚴天子。勇猛不退轉天子。妙華纓光明天子。最勝幢光明天子。寶髻普光明天子。光明眼天子。持勝德天子。普光明天子。如是等而爲上首。其數無量。疏名中可畏敬幢者。爲惡者畏其照明。爲善者敬其辦業。以斯超出。故以名幢。皆勤修習利益衆生。增其善根。

疏德中居者辦業。成就本行等利益也。生長穀稼。開敷覺華等。爲增長善根。如出現品。

復有無量三十三天王。

疏三三十三天者。佛地論等皆云。妙高山四面各有八大天王。帝釋居中。故有二十三也。下釋天名。皆依佛地。

所謂釋迦因陀羅天王。普稱滿音天王。慈目寶髻天王。寶光幢名稱天王。發生喜樂髻天王。可慶樂正念天王。須彌勝音天王。成就念天王。可慶樂淨華光天王。智日眼天王。自在光明能覺悟天王。如是等而爲上首。其數無量。

疏名中言釋迦等者。釋迦能也。因陀羅王也。具足應云釋迦提桓因陀羅提桓天也。卽云能天王。撫育勸善能爲天王故。更有異釋。如音義說。鈔更有異釋等者。彼云釋迦正云鑠迦羅。此云帝也。因陀羅。此云王也。古來釋同佛釋種族望之稱。謬之深矣。又楞伽大雲疏云。天帝名有一百八。今畧舉三一。因陀羅。此云尊重。三十三天共尊重故。二云釋迦。此云勇猛。威德勇猛勝諸天故。三名不蘭陀。此云降伏。以能降伏阿修羅故。

皆勤發起一切世間廣大之業。

疏德中言發起廣大業者。令修普賢行故。以此天居地天之頂。總御四洲。雖勝事頗多。猶懼修羅之

敵若修善者衆。即天侶增威。苟爲惡者多。即諸天減少。故多好勸發。况受佛付囑。大權應爲。至如堅常啼之心。施雪山之偈。成尸毘大行。破盧志巨慳。談般若於善法堂中。揚大教於如來會下等。皆是發起廣大業也。鈔猶懼修羅者。修羅嫉天有甘露味。諸天求修羅之女色。因起爭競。廣有因緣。若修善者。正法念經說。帝釋知修羅欲求。遽遣天使。令觀閻浮之人。爲修善多。爲作惡多。若修善多。知戰必勝。故生歡喜。若爲惡者多。不孝父母。不敬三寶。則生憂悴。知戰不勝。今言減少者。兼辨餘時。爲惡必墮三塗。故人天減少。况受佛付囑者。則淨名。大品等。皆囑天帝。大權應爲者。小乘中說是須陀洹。若準此經。例是大權菩薩。至如下。引事證成。堅常啼之心。大品般若。施雪山之偈。即涅槃十三成尸毘大行。卽方便報恩經。破盧志巨慳。卽盧志長者經。談般若等者。大品廣說。揚大教等者。淨名大品等。其類非一。恐厭文繁。不能具出。

復有無量須夜摩天王。

疏四。須夜摩天。須者善也。妙也。夜摩時也。具云善時分天。論云。隨時受樂。故名時分天。又大集經。此

天用蓮華開合以明晝夜。又云赤蓮華開爲晝。白蓮華開爲夜。故云時分也。隨此特別受樂亦殊。故論云隨時受樂也。

所謂善時分天王。可慶樂光明天王。無盡慧功德幢天王。善變化端嚴天王。總持大光明天王。不思議智慧天王。輪齋天王。光燄天王。光照天王。普觀察大名稱天王。如是等而爲上首。其數無量。皆勤修習廣大善根。心常喜足。

疏德中心恒喜足者。喜足在於第四。今慕上而修。復有不可思議數毘率陀天王。

疏五毘率陀天王。此云喜足。論云後身菩薩於彼教化。多修喜足之行。故得少意悅爲喜。更不求餘爲足。

所謂知足天王。喜樂海髻天王。最勝功德幢天王。寂靜光天王。可慶樂妙目天王。寶峰淨月天王。最勝勇健力天王。金剛妙光明天王。星宿莊嚴幢天王。可慶樂莊嚴天王。如是等而爲上首。不思議數。皆勤念持一切諸佛所有名號。

疏德中。彼天是諸佛上生之處。故令修念佛三昧也。召體曰名。響。頌。人天爲號。通號別名。皆悉念也。

不記一方。故云一切。以諸如來同一法界。體德均故。念卽明記。而慧逾增。持而不忘。故無間斷。以佛爲境。何五塵之能惑哉。

復有無量化樂天王。

疏六化樂天王。論云。樂自變化。作諸樂具。以自娛樂。又但受自所化樂。不犯他故。名爲善化也。變。謂轉變。轉。籠爲妙。化。謂化現。無而忽有。

所謂善變化天王。寂靜音光明天王。變化力光明天王。莊嚴王天王。念光天王。最上雲音天王。衆妙最勝光天王。妙髻光明天王。成就喜慧天王。華光髻天王。普見十方天王。如是等而爲上首。其數無量。皆勤調伏一切衆生。令得解脫。

疏德中。以出世化。故得解脫。

復有無數他化自在天王。

疏七他化自在天王。論云。令他化作樂具。以自娛樂。顯已自在故。

所謂得自在天王。妙目至天王。妙冠幢天王。勇猛慧天王。妙音句天王。妙光幢天王。寂靜境界門天王。妙輪莊嚴幢天王。華藥慧自在天王。因陀羅力妙莊嚴光明天王。如是等而爲上首。其數無量。

撰述
聖嚴師金卷一之四
撰述
疏名中寂靜境界門者。境爲入理之處。卽是門也。根無躁動。故稱寂靜。根卽門也。根無取著。方見境空。合爲門也。故央掘經云。明見來入門。具足無減修。

皆勤修習自在方便廣大法門。

疏德中物我自在卽廣大法門。初欲界天衆已

竟。

復有不可數大梵天王。

疏第二色界諸天衆有五衆。以第四禪有二衆。故然四靜慮攝天多少。下經頻列。至十藏品當會釋。

之多。依十八初靜慮四。二三各攝三天。皆舉最上。以勝攝劣。故但列一。下文說頌徧觀諸天。第四靜慮自攝九天。上五小乘聖居。非此正被。異生位中。廣果至極。故今列之。大自在天。三千界主。所以別列。

今初大梵天王衆。佛地論云。離欲寂靜。故名爲梵。具云梵摩。此云清潔寂靜。謂離欲染。故名清潔。得根本定。名爲寂靜。

所謂尸棄天王。慧光天王。善慧光明天王。普雲音天王。觀世音自在天王。寂靜光明眼天王。光徧十方。

天王變化音天王。光明照耀眼天王。悅意海音天王。如是等而爲上首不可稱數。

疏戶棄此云持髻。謂此梵王頂有肉髻似螺形。故亦名螺髻。或云火頂。以火災至此故。貌如童子。身白銀色。衣金色。衣禪悅爲食。

皆具大慈憐愍衆生。舒光普照。令其快樂。

疏德中本修慈心。得生梵世。等流相續。還愍衆生。好請轉法輪。故智光照物。不爲汙行。故身光發揮。若有遇之。身心悅樂。

復有無量光音天王。

疏第二光音天。二禪第三天也。智論亦云第二禪。通名光音。彼天語時。口出淨光。故有云彼無尋伺。言語亦無。用光當語。故名光音。瑜伽名極光淨。謂淨光徧照。自他處故。

所謂可愛樂。光明天王。清淨妙光天王。能自在音天王。最勝念智天王。可愛樂清淨妙音天王。善思惟音天王。普音徧照天王。甚深光音天王。無垢稱光明天王。最勝淨光天王。如是等而爲上首。其數無量。皆住廣大寂靜喜樂無礙法門。

疏德中定生喜樂離尋伺故。得寂靜名。然凡得之。

撰述
華嚴疏鈔卷一之四
捨動求靜。故非廣大。味定之喜。非無礙法。今菩薩
卽動而靜。不散不味。是爲廣大無碍法門也。
復有無量徧淨天王。

疏第三徧淨天。此天離喜。身心徧淨故。

所謂清淨名稱天王。最勝見天王。寂靜德天王。須彌
音天王。淨念眼天王。可愛樂最勝光照天王。世間自
在至天王。光燄自在天王。樂思惟法變化天王。變化
幢天王。星宿音妙莊嚴天王。如是等而爲上首。其數
無量。悉已安住廣大法門。於諸世間勤作利益。

疏德中身心徧淨未爲廣大。物我無二。普益世間。

方爲廣大也。

復有無量廣果天王。

疏第四廣果天。卽第四禪第三天。於異生善果。此
最廣故。所有功德。勝下三故。

所謂愛樂法光明幢天王。清淨莊嚴海天王。最勝慧
光明天王。自在智慧幢天王。樂寂靜天王。晉智眼天
王。樂旋慧天王。善種慧光明天王。無垢寂靜光天王。
廣大清淨光天王。如是等而爲上首。其數無量。莫不
皆以寂靜之法。而爲宮殿安住其中。

疏德中。此天離八災患。世中最寂。今以實智住本。

寂之宮。

復有無數大自在天王。

疏第五大自在者。梵云摩醯首羅是也。於三千界最自在。故智論第二云。此天有八臂三目。乘白牛。執白拂。一念之間能知大千雨滴。下經同此智論第一。過五淨居。有十任菩薩住處。亦名淨居。號大自在天王。又三乘中立此爲淨土。是報身所居。約實。但是第十地菩薩攝報之果。多作彼王耳。

所謂妙談海天王。自在名稱光天王。清淨功德眼天王。可愛樂大慧天王。不動光自在天王。妙莊嚴眼天王。善思惟光明天王。可愛樂大智天王。普音莊嚴幢天王。極精進名稱光天王。如是等而爲上首。不可稱數。皆勤觀察無相之法。所行平等。

疏德中三界之頂。非無相不超。非離相求。故所行平等。

然上釋各歎德。皆從義便。以順類殊。若約實德。無不互有。皆可虛求。衆海雲集。竟已下入第二卷第七稱揚讚德。

比丘圓慧 領袖刻此一卷

廣勤 一兩 海慈 一兩 鈕盛年 五錢

覺正 五錢 沈湛盧 四錢 石宵 三錢

比丘智余捨鉢資一兩五錢薦

父俞堂母湯妙真 師友本寧真權洎

各檀那同證毘盧性海

大方廣佛華嚴經疏鈔卷第一之四 終



二十